


Te Tapairu o Te Tairāwhiti





Kia kōrero ināianeī mō te haere a Tūrongo ki te tairāwhiti, ki te rapu i tētehi hoa wahine. Nō muri tēnei i ngā mahi kino a Whatihua ki a Tūrongo, ana ka wehe a Tūrongo ki te kimi i a Māhinaarangi; he puhi, he wahine ātaahua nō Ngāti Kahungunu, he uri hoki nō Paikea, nō Porourangi.




Nō reira, ka haere a Tūrongo ka haere i te whenua. Ka heke haere ia ki Te Matau-a-Māui ka tae atu ki te takiwā o Roto-a-Tara. Kei te takiwā o Te Aute tēnei roto, kei reira te pā o Kāhōtea, ko te kāinga tēnei o Tūaka te pāpā, rāua ko Te Angiangi te māmā, me tā rāua tamāhine, me Māhinaarangi.



I tētehi rā ka tae mai he tangata, he tauhou hoki. Ko Tūrongo tērā.



E hanga whare ana te iwi rā, e wāwāhi rākau ana hei poupuu mō tētehi whare hōu. Ka haere a Tūrongo ki te āwhina i te iwi, he tino kaha ia ki te wāwāhi rākau, he mōhio ki te whakamahi toki.



Ka oti i a ia ka haere ia i te taha o tētehi ope ki te mahi manu i te ngahere. He mōhio hoki a Tūrongo ki tērā mahi.



Ka mīharo a Tūaka te matua o Māhinaarangi ki te mahi a Tūrongo, ka kī ki tana tamāhine ki a Māhinaarangi “Ka pai hoki a Tūrongo hei tāne māu”. Ka titiro a Māhinaarangi ki a Tūrongo, ka kapakapa te manawa. Kua pupū hoki te aroha i roto i a Tūrongo mōna mō Māhinaarangi. Ahakoa tēnei, kāore te tokorua rā i whāki ki a rāua anō.




Heoi anō, i ngā pō i a Tūrongo e hoki ana ki tana moenga ka tūtaki ki tētehi wahine, pai ana hoki te kakara o te raukawa. Kīhai a Tūrongo i mōhio ko Māhinaarangi tērā, he pōuri nō te pō. Hoki atu hoki atu ko tēnei te mahi i ngā pō.



Nā, i tētehi rangi ka whakaaro a Tūrongo. “Me haere au i te awatea kia mōhio ai, nō wai te kakara raukawa nei.” Ka haere a Tūrongo ka whakataruna kei te whīkoi noa iho, engari i te hongihongi haere ia i ngā wāhine o te pā.



Ka tata ia ki a Māhinaarangi, kātahi ka kaha rangona te kakara o te raukawa. Ka tata ia ki a ia, ka huri a Māhinaarangi ki a Tūrongo, ā, ka awhiawhi rāua i a rāua. Harikoa te iwi rā i tēnei, ā, ka whakaae a Tūaka kia moe rāua.




Ka haere te wā, ka hapū a Māhinaarangi, nō reira, ka hoki a Tūrongo ki tōna ake whenua ki te whakarite kāinga mō tana whānau. Engari, ka waiho e ia tana kurī a Waitete ki te taha o Māhinaarangi.



Ka haere te wā ka whakatika a Māhinaarangi me tētehi tira ki te haere ki Rangiaātea, ki te kāinga o Tūrongo.



Ka wehe i tana kāinga, ka haere mā Waikaremoana, mā Te Urewera, mā Te Moana-a-Toi, mā Tauranga-moana. Ka piki i ngā hiwi i te rāwhiti o Te Kaokao-roa-o-Pātetere, i reira ka whānau mai tā rāua pēpē ko Tūrongo.



Ka whakaarotia kia tapaina te pēpē nei ki te kakara; ka mau te ingoa o Raukawa. Ka haere tonu te tira, ka noho ka whakatā i tētehi wāhi, ka haere anō. Ka whakawhiti i te awa o Waikato i Te Kūititanga, ā, ka tae ki te take o Maungatautari, i reira kua whakarērea rātou e Waitete, ka oma ia ki Rangiaētea.



Ka kite a Tūrongo i tana kurī ka mōhio, kua tata mai a Māhinaarangi mā. Nō reira ka whai ia i tana kurī ki te wāhi e whanga ana a Māhinaarangi rātou ko Raukawa. Ka tae atu ki a rātou, ka hongī, ka mihi, ka awhiawhi ia i a Māhinaarangi rāua ko Raukawa.

Nā Paraone Gloyne ngā kōrero
Nā Hākopa Pore ngā pikitia

Text and Illustrations copyright © Raukawa Charitable Trust, Te Poari Manaaki o Raukawa
All rights reserved. Enquiries should be made to the publisher.

This resource is available from www.raukawa.org.nz
June 2015
ISBN 978-0-9941231-1-4

